

Magazinimi i përkohshëm

Neni 112

1. Kur vendet e përmendura ne nenin 76 (1) të Kodit, janë miratuar në mënyrë të përhershme për vendosjen e mallrave në magazinim të përkohshëm, këto vende quhen “ambiente për magazinim të përkohshëm”.
2. Për të siguruar zbatimin e legjislacionit doganor autoritetet doganore mund, në rast se nuk i administrojnë vetë ambientet e magazinimit të përkohshëm, të kërkojnë që:
 - a) ambientet e magazinimit të përkohshëm të mbyllen me dy dryna, dhe çelësi i njërit të mbahet nga autoritetet doganore;
 - b) personi i cili administron ambientet e magazinimit të përkohshëm duhet të bëjë regjistrimin e mallit të magazinuar, për të mundësuar ndjekjen e lëvizjes së mallrave.

Neni 113

1. Autorizimi për ambiente të magazinimit të përkohshëm lëshohet nga Drejtori i Përgjithshëm i Doganave. Ky nen nuk zbatohet për ambiente të magazinimit të përkohshëm të cilat administrohen nga autoritetet doganore.
2. Për të marrë një autorizim për ambiente të magazinimit të përkohshëm duhet të jepet një garanci. Shuma e garancisë që duhet të depozitohet, në asnjë rast nuk duhet të jetë më e vogël sesa 4 milionë Lekë. Bën përjashtim vetëm rasti kur ambientet e magazinimit të përkohshëm administrohen nga ente publike ose shtetërore, të cilat nuk është e nevojshme të depozitojnë një garanci të tillë. Garancia duhet të depozitohet përpara se të lëshohet autorizimi. Në këto raste zbatohet neni 207(2) i Kodit.
3. Kërkesa me shkrim për autorizim sipas paragrafit 1, duhet të nënshkruhet nga personat e interesuar dhe të depozitohet në zyrën doganore kompetente për vendin ku ndodhet ambienti i magazinimit të përkohshëm. Kjo zyrë brenda 2 javësh, duhet t'ia kalojë kërkesën Drejtorit të Përgjithshëm të Doganave së bashku me mendimin e tyre me shkrim përsa i përket dhënies së autorizimit.

Kërkesa duhet të përmbajë të dhënat e mëposhtme:

- a) emrin dhe adresën e kërkuarit;
 - b) informacion lidhur me aktivitetin kryesor të biznesit të kërkuarit;
 - c) numrin e parashikuar të dërgesave për një vit;
 - d) numrin e të punësuarve;
 - e) përshkrimin e regjistrave të magazinës;
 - f) kopje të vërtetuara të dokumentave të regjistrimit të shoqërisë;
 - g) hartë, skicë, ose tregues të ngjashëm të vendodhjes së ambientit dhe kufijve.
4. Autorizimi lëshohet për një afat kohor prej 1 viti për çdo herë dhe me kushtet e parashikuara në autorizim.
 5. Administruesi i ambienteve të magazinimit të përkohshëm duhet të përmbushë gjithë kushtet dhe rregullat e parashikuara në autorizim në lidhje me kontrollin doganor, çlirimin e mallrave, regjistrat e magazinës dhe rregulla të tjera. Nëse administruesi i ambienteve të magazinimit të përkohshëm nuk përmbush gjithë kushtet e parashikuara në autorizim, atij i shfuqizohet menjëherë autorizimi dhe gjithë mallrave të ruajtura u caktohet menjëherë një destinacion doganor.
 6. Një prej kushteve që duhet të plotësojë mbajtësi është krijimi i kushteve të punës për autoritetet doganore kur ata vijnë për kontroll, pa asnjë shpenzim nga këto të fundit. Këto ambiente, duhet të plotësojnë standardet e përcaktuara nga Drejtoria e Përgjithshme e Doganave.
 7. Për çdo autorizim paguhet një tarifë, në shumën 400.000 Lekë për çdo periudhë 1 vjeçare, në mënyrë që të mbulojë shpenzimet administrative për autoritetet doganore.

Neni 114

Mallrat vendosen në ambientet e magazinimit të përkohshëm në bazë të deklaratës përmbledhëse. Megjithatë, autoritetet doganore mund të kërkojnë paraqitjen e një deklarate të veçantë, hartuar në një formë e cila korrespondon me modelin që ata kanë përcaktuar.

Neni 115

Administruesi i ambienteve të magazinimit të përkohshëm duhet të kryejë inventar të rregullt për gjithë mallrat e ruajtura atje. Inventaret duhet të bëhen të paktën një herë në çdo 3 muaj. Autoritetet doganore duhet të jenë të pranishme ndërsa bëhet inventari. Rezultati me shkrim duhet t'i dërgohet zyrës kompetente doganore brenda 3 ditësh pas inventarit. Ky nen zbatohet *mutatis mutandis* në ambiente të magazinimit të përkohshëm të administruara nga autoritetet doganore.

Neni 116

Pa rënë ndesh me nenin 81 të Kodit, ose me dispozitat që zbatohen për shitjen e mallrave nga autoritetet doganore, personi i cili ka bërë deklaratën përmbledhëse, ose në rastet kur një deklaratë e tillë nuk është

paraqitur ende, personi i përmendur në nenin 69 (2) të Kodit, është përgjegjës për zbatimin e masave të marra nga autoritetet doganore në përputhje me nenin 78 (1) të Kodit dhe për mbulimin e shpenzimeve lidhur me këto masa.

Neni 117

Shitja e mallrave nga autoritetet doganore në rastet e parashikuara në përputhje me nenin 78 të Kodit kryhet në bazë të dispozitave në fuqi.

